

բռնկւած հրդեհը մարելու: Ճիշտ է, ապր. 3-ին կատարել էր նախարարութեան մասնակի լրացում. կառավարութեան մէջ մտցել էին Ա. Զամալեանը, Ռ. Տէր-Մինասեանը, Ս. Վրացեանը, որով Հ. Յ. Դ. Բիւրօի անդամների մեծ մասը դառնում էին նախարար, բայց կառավարելու եղանակը՝ խորհրդարանական դանդաղաշարժ մեքենայով՝ չէր համապատասխանում վայրկեանի պահանջին: Անհրաժեշտ էր արագաշարժ ու վճռական իշխանութիւն: Հարկաւոր էին կտրուկ միջոցներ: Այդ կարող էր տալ միայն Հ. Յ. Դաշնակցութիւնը:

Մայիս 5-ին գումարեց Պորհրդարանի արտակարգ նիստը, որը ընդունեց Ա. Պատիւեանի նախարարութեան հրաժարականը և նշանակեց նոր կառավարութիւն. Հ. Յ. Դաշնակցութեան Բիւրօն իր ամբողջ կազմով անցաւ իշխանութեան գլուխը*): Փաստօրէն յայտարարուած էր Դաշնակցութեան դիկտատուրա: Պորհրդարանը մի ամսով դադարեց:

Նոր կառավարութիւնը անմիջապէս հայրենիքը յայտարարեց վտանգի մէջ և ժողովրդին ուղղեց հետևեալ կոչը.

Հայաստանի Հանրապետութեան քաղաքացիներին.

Քաղաքացիներ՝.

Հերոսական պայքարով և անօրինակ զոհողութեամբ հայ աշխատաւոր ժողովուրդը տիրացել է անկախութեան և ազատութեան և միացնելով բռնաւորների կամքով դարեր շարունակ իրարից բաժանւած հայրենիքի երկու հատւածները՝ հիմք է դրել պետական յառաջադէմ շինարարութեան: Հայաստանի Պարլամենտի և կառավարութեան ամբողջ մտահոգութիւնն է եղել ապահովել աշխատաւոր ժողովրդի Ֆիզիքական գոյութիւնը ու սոցիալական անարգել զարգացումը և անսասան պահել հանրապետական դեմոկրատիկ իրաւակարգը:

Քաղաքացիներ, այսօր, Հայաստանի ժողովրդի այս բախտորոշ վայրկեանին, նորից ամպեր են կուտակուում մեր երկրի գլխին: Մահւան ճիրաններում պայքարող տաճիկ փաշաները մի կողմից և բոլշևիզմի կարմիր պատմուձանը հագած ագրէշանեան խաները միւս կողմից՝ նորից սպառնում են Հայաստանի անկախութեան և ազատութեան: Գիտակցաբար կամ անգիտակցօրէն նրանց օգտին են զործում և մի շարք տարրեր երկրի ներսում, որոնք աշխատում են օգտագործել պարենաւորման ճղնաժամն ու ժողովրդի յոգնածութիւնը, որպէսզի առաջ բերեն անկարգութիւններ և իրենց նեղ եսական տենչերին յազուրդ տան:

Եւ այն ժամանակ, երբ Ագրէշանի զօրքերն ու հրոսախմբերը շարունակում են արհեստեղութիւնը Ղարաբաղում և Գանձակում, այն ժամանակ, երբ տաճիկ ասկեարները շարժումներ են անում Շարուրի և Նախիջևանի

*) Վարչապետ և արտ. գործ. նախարար Հ. Օհանջանեան, ներքին և զինուորական՝ Ռ. Տէր-Մինասեան, ելեւտական՝ Ա. Գիւլիսանդանեան, հաղորդակցութեան՝ Ա. Զամալեան, գիւղատնտեսութեան, պետական գոյքերի և աշխատանքի՝ Ս. Վրացեան, ինժեներաւորութեան՝ Ս. Արարտեան, հանրային կրթութեան և արեւսախ՝ Գ. Ղազարեան: